

## **PILIMON** **Pol Rii Pilimon Riina Har Jey Maji**

<sup>1</sup> Ada eeta Pol. Ada Jisas riiti hik pokojichawa ma. Ada noti kumwoy yaka Timoti riitaka diita jey keyichi Pilimon miina hato. Miita noti kumwoy yaka siiken nota yo kiki otii. <sup>2</sup> Sicha, sichi mowey, Apia, siina Akipas riitaka keyichi habato. Akipas rii notaka ow ana pi ma tawa.

<sup>3</sup> Eeta kepi noti Apoko God riita Harapa Jisas Kraist riitaka kwona rukusiiitanak, kwoti inyakak wopu otii kwoya hiki takiita.

### *PILIMON RIITA RUKUSII TAWA MAJI*

<sup>4</sup> Eyey nedii ada God riina maji ba tawak, ada Pilimon miiti hin ada God riina woshiato.

<sup>5</sup> Ada meejito miita Harapa Jisas riina hiki siitiichichawa inyaka eena meeji tawak, miita God riiti ma mima yenza rukusii tawey, eena ada God riina woshiato. <sup>6</sup> Nota Kraist riina hiki siitiichichawak, nota kepi tawak, ada God riina wohecho: miita miiti hiki siitiichichawa inyaka akar ma yenza sawo tawak, yecha eechaba Kraist riiti hadabas hokwa sokwa tawa boboy ya takiita.

<sup>7</sup> Ayo, miita eyey God riiti ma mima yenza rukusii tawak, miita yechi inyaka wopu kiyapo hamar. Eecha otirek, eena ada eeji inyaka kwoya hiki tawak, eeji bii eshar tawa.

### *ONISIMAS MAJI*

<sup>8</sup> Eecha otii tawak, an eecha hikitu: Kraist riiti hik ada miina yaka kumwoy tawak, anapa

miina wochanak boboy kada boboy miipa keena otiikiita. <sup>9</sup> Wowak, anapa sakapa eecha bakiitawak. Rukusii tawa boboy sii ana wohegiya tawak, eena an miina wohecho. Ayo, ada eeta Pol, ada apoko saba ma tawak, ada Jisas Kraist riiti pokojima tawa. <sup>10</sup> Eena ada Onisimas riiti hik miina wohecho. Jisas riiti hik rii eeta eeji yikapwa. Ada pokojima akak tarek, ada riina hiki siitiichichawa maji pokii tarek, ada riiti apokoga eecha siir. <sup>11</sup> Mashi rii miina kiyatay yo kepi otiikasakech. Wowak, apa riipa yo kepi otiiniga miitaka adaka kiyatayichikiita.

<sup>12</sup> Ada riina miitak heechi tawak, ichu. Ichawak, eeji inyaka wopu riitaka eecha ichu.

<sup>13</sup> Ada hadabas maji sawo tarek, ye ana pokojima akak heechir. Eena ada Onisimas riina diika heechi tak. Ada eecha otiiney, riipa ana kiyatay takiita, miiti hin. <sup>14</sup> Wowak, ada sakapa miina wohegiyakiitawak, ana kiyatayeken. Yaho. Miiti inyaka wopuk miita wohowunak, wonyak riipa ana kiyatayek.

<sup>15</sup> Rii miina ameda nedii kada heechi ir. Kapo eecha tawak, miipa riin kawka yeechi yayanak, riipa miitaka eechaba eechaba takiita. <sup>16</sup> Apa rii yo sobo otii tawa wakasa makasakech. Yaho. Apa rii eeta harapa. Rii eeta noti yaka kumwoy siiken tawak, ada riina rukusiito. Ayo, riita eeji yaka kumwoy tawak, rii Jisas riiti hik miiti yaka kumwoy tawak, miita keena riina harapa rukusiito.

<sup>17</sup> Wonyak, miita eecha hiki taney, ada miiti nareboy tawey, miita ana harenaka eecha otiiney, miita riina eechaba na otii. <sup>18</sup> Riita miina

boy yikadey boboy kapaseken otiiney, eena eeji hik keyichicha. <sup>19</sup> Na he: ada eeji tapa siiki-inek keyitu: Ada eeta Pol, ada miinapa awasen tokochikiita. Ayo, miita ana awasen ha boboyeka tawa. Eekana eeta miiti inyaka wopu saniga. Wowak, anapa sakapa eena bakiitawak. <sup>20</sup> Ayo, eeji yaka kumwoy, Harapa riiti hik diina ana otichi. Miita eeji yaka kumwoy Kraist riiti hik tawak, eeji inyaka wopu na kiyapo!

<sup>21</sup> Ada diita keyi tawey, ada eecha hikitu ada miina wohechawey, miinapa otiikiita. Ayo, ada eecha hikitu miipa harapa yo siiken otiikiita. <sup>22</sup> Wonyak, aka wo poche na sayarechi heechi ta. Ada eecha hikitu God riipa meejikiita kwota riina wohechawey. Wonyak, anapa kwotak awasen yakiita.

### *WOSHIA MAJI KAW*

<sup>23</sup> Epapras rii miina woshiato. Rii adaka pokojima tawa. Sicha Jisas Kraist riiti pokojima tawa. <sup>24</sup> Eeji yomesh mesh yo otii tawa ma, Mak, Aristakas, Dimas, Luk ye miina woshiabato.

<sup>25</sup> Harapa Jisas Kraistriiti rukusii tawa boboy sa miitaka eecha ta.

## **GOD RIITI MAJI KEPI**

**The New Testament in the Washkuk Language, also known as the Kwoma Language, of Papua New Guinea  
Nupela Testamen long tokples Washkuk long Niugini**  
copyright © 1974 Wycliffe Bible Translators, Inc.

Language: Washkuk (Kwoma)

Dialect: Kwoma or Washkuk

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.  
Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-01-08

---

PDF generated using Haiola and XeLaTeX on 11 Nov 2022 from source files dated 9 Oct 2020

df8dc48f-feff-515c-a5a2-c9c957dac5bb